



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :



Tir Yimiyim



tir\_yimiyim



tir yimiyim

TAPAK 7

**An Se Young-i Indonesia Open kokogo**

**Pakistan interior minister Mohsin Naqvi-i Tehran semdang**



Dipke

VOL. XXIII ISSUE NO. 235 (ADOK 235) DIMAPUR TENTONÜ (MONDAY) AAMI (JUNE) 08, 2026

₹ 5.00

## Ukhrul nung Assam Rifles outpost atema raratep

**Imphal, June 7, 2026 (Agencies):** Manipur kübok Ukhrul district nung temporary Assam Rifles outpost ka amenokba anema lungkak aidang nisung 20 shi yiruogo.

Assam Rifles-i Shokvao yimtsüng telongtet kübok New Heaven nung yimtsüng ketdangpurtem dang nungi temelaba magii temporary outpost ka amenok.

Lokti lenirtem aser yimtsüng ketdangpurtemi iba outpost ya ozüngi memelar ta ashir aser agientsü atema mepishia arur.

Yimtsüng bangdakpurtem aser lenirtemi iba outpost agientsü atema aiben shidi zülüaka mapa meinyaker aser iba jagi nübertem mepelar.

Tanü Ukhrul district kübok tesem ama- Shokvao village kübok New Heaven aser Shangshak village kübok Finch Corner nung sepaitem aser lungkak aiter tsüngda mepetmesü adok.

Item sentong nung tetsürtem dena yimdklar aikati shilem agi aser parnoki outpost agientsü atema takhangba agütsü.

Ajisüaka, sepaitemi lungkak aitertem senshidaktsütsü merandang tensa tamajungba aküm ta osang angazüker.

Assam Rifles sepaitemi tetsürtem dak süng agi züka merenshiba indang video tem social media nung prokshir. Item video nungsa injang aika khatokba angur saka iba kuli tejangja mengutet lir.

Tensa tamajungba küma aoba agi sepaitemi telok azüoktsü atema tear gas amshitsüsa aküm. Iba tatalokba nung nisung 20 shi yiru ase parnok Ukhrul District Hospital nung anioka anepalu.

Iba tatalokba ya nübertemi aitsür aser parnoki temporary outpost agientsü takhangba maneni agütsür.

Iba osang zülü tashi nung Assam Rifles nungi sangdong kecha magütsü lir.

## CRPF DG-i Manipur Governor den ajurutep

**Imphal, June 7, 2026 (Agencies):** Central Reserve Police Force (CRPF) Director General Gyanendra Pratap Singh-i Manipur Governor Ajay Kumar Bhalla den ajurutepogo.

Iba senden nung Gyanendra Pratap-i Manipur nung CRPF ajanga telungpur azüoktsü aser security akangshitsü sentongtem lemsatep.

Iba mapang operational preparedness, strategic planning aser CRPF-i Manipur nung telungpur khuret azüoktsü indang tebilembatem lemsatep ta CRPF post ka nung ashi.

CRPF ketdangsürtemi Governor dang law and order tensa osang lemsatepba den security tayongzükbatem koktetsü atema maparen inyakba lemsatepogo ta Raj Bhavan sangdong ka nung ashi.

Kangpokpi district nung tetsür ka dena nisung asem tepsetba

aser ki tenet nung mi senoktsüba lendong atalokba sülen ghonda ishika lir iba senden menogo.

Loibol Khullen yimtsüng nung iba mapa inyakertem pua arutsü atema sepaitemi search operations tenzuka inyakdar.

Centre-i Manipur nung security akangshitsü atema CRPF indang Commando Battalion for Resolute Action (CoBRA) battalion ana mapa lezmüksütsü mulunga agizükogo.

CoBRA ya guerrilla aser jungle warfare nung training agiba specialised unit ka lir.

CoBRA battalion tem ajanga Manipur nung telungpurtem anema inyakba mapa nung yariteptsü aser area domination exercises agitsü imlar.

CoBRA battalions ajanga Manipur nung ozüng alema inyakshangshiba telungpur teloktem anema inyaktsü ta tongti ketdangsür kati ashi.

## Assamese nunger dak azükba atema Naga lanur 5 apu

**Guwahati, June 7, 2026 (Agencies):** Guwahati nung Assamese lanur ka züka merenshiba atema Dispur Police-i Nagaland nungi lanur pungu puogo.

Iba ya Ganeshguri area nung atalok aser Naga lanurtem jagi Pathsala nung alir Simu Das dak azük ta osang angazüker.

Lanur pungu jagi Das dak taochi kecha melii azük aser iba mapangji pa khasettsü ta amokmerenba ajanga temeket


nung alirtem tsübudaktsü ta osang ajanga ashir.

Iba tatalokba sülen Dispur Police-i bushisüngdang ka tenzük aser nisung punguprong puogo. Ajisüaka parnoki kechiba Das dak azük iba kuli ano memetdaksü lir.

Police-i lanur pungu dang asüngdangya südar aser iba lendong atalokba atema bushisüngdang südar.

Police-isa public dang kuli maliba osang meprokshtitsü metetdaksüogo.

## Hindu-Muslim agenda agientsüla: CJP founder Abhijeet Dipke



Cockroach Janta Party (CJP) founder Abhijeet Dipke-i June 6, 2026 nü Jantar Mantar, New Delhi nung pa pusemertem den o jembidang agiba noksa ka angur.

**New Delhi, June 7, 2026**

**(Agencies):** Tesüiba küm ter tsüngda Indian politics ya Hindu-Muslim agenda nung dang rangloker inyaka arur aser ibala onük ajanga mapa manguba khuret amala tebilemstütem asoshi kecha meinyaker ta Cockroach Janta Party (CJP) founder Abhijeet Dipke-i ashi.

Delhi nung aliba Jantar Mantar nung lungkak aitiba sentong ka ayonga agiba sülen Dipke-i Deobarnü Chhatrapati Sambhajinagar nung osangbenertem den jemb.

Union education minister Dharmendra Pradhan-i NEET paper leak aser CBSE OSM metokmeperi atema menden toktsütsüla ta Dipke-isa takhangba agütsüshio.

CJP movement ya apolitical lir aser party kecha den-a tesentaktep mayutsü ta paisa ashi.

Linük nung yimtenren mapa ya lanurtem dak kongshiba

onüktem talisa, employment aser education asoshi inyaksüla ta CJP founder Dipke-i ashi.

"Tesüiba küm 10-12 tsüngda linük politics ya Hindu-Muslim agenda indang inyaker. Iba onük ajanga mapa magütsütettsü. Asenoki iba nung temulung magütsütsüla aser sorkar indang tebilemstütem melentsüla" ta paisa ashi.

"Dharmendra Pradhan mapa nungi anenba sülen onoki education system nung temelenshi bener arutsü atema agenda ka renemsü. Iba ya yangi metembangtsü kechiyong mapa manguba khuret ya linük asoshi tongti tebilemstü ka lir" ta Dipke-isa metetdaksü.

"Jantar Mantar nung nisung aika adenshi aser noksatem ajanga nisungtem kuli agütsür. Parnoki nisung kwi ka Pakistani nunger ta ashitsü? Parnoki lungkak aitiba kaketshirtem, Opposition aser media dang Pakistani nunger ta ajatsü asü?"

ta Dipke-isa asüngdang.

Ruling party tem indang 'IT cell' nisungtem ya dang India nunger asü? ta paisa asüngdang.

Pai aniba movement aser Nepal o Bangladesh nung sorkar melenshitsüsa lungkak aitiba mesükteper ta nisung kari jembiba CJP founder Dipke-i magizük.

"Asen kidanger linüktem den ozü movement medemdangtsü makok aser Jantar Mantar nung tiptema agiogo. Kechiba süra India nung system ka lir. Jantar Mantar nung lungkak aitiba sentong nung linük ajaklen nungi lanurtem aden" ta paisa metetdaksü.

"Political lenirtem aser teloktemi pusemba metetdakjaka CJP ya independent asütsü. Onoki political party lenir shinga den-a mejembi. Iba movement ya Gen Z atema lir. Tema nung pusemnüra kecha masü saka onoki political party kecha den-a tesentaktep mayutsü" Dipke-isa jangjatsüogo.

## Assam nung minister 16 nem guardian districts lezmüksür

**Guwahati, June 7, 2026**

**(Agencies):** Assam Chief Minister Himanta Biswa Sarma-i Deobarnü minister 16 nem guardian districts lezmüksüogo.

Pai aniba Council of Ministers nungi züngsem 16 nem districts lezmüksü aser iba ya state sorkar aser district administration tem tsüngda amalitep akangshitsü nükjidong nung lir.

"Minister temi district administrations den sendaktepa terenlok mapatem tekaraba inyaka aotsü aser state nung sorkar ketdangsübaren jenjang tajungba akümtsü" ta CM Sarma-i ashi.

Iba inakyim tasen kübok Union minister nungi state minister akümba Rameswar Teli nem Tinsukia aser Jorhat district

ana lezmüksü aser AGP president Atul Bora nem Kamrup (Metro) aser Dhemaji lezmüksü.

Charan Boro-i Kokrajhar, Baksa o Chirang aser Ajanta Neog-i Morigaon o Kamrup district tem reprangtsü.

Maneni, Ashwini Ray Sarkar nem Bongaigaon o Barpeta, Ashok Singhal nem Darrang o Dhubri aser Bimal Bora nem Sivasagar o Charaideo district tem lezmüksü.

Taoba Assembly Speaker Biswajit Daimary-i Nalbari o Sonitpur, Jayanta Mallabaruah-i Tamulpur o Goalpara, Kaushik Rai-i Sribhumi o Hailakandi, Keshab Mahanta-i South Salmara-Mankachar o North Lakhimpur, aser Krishnendu

Paul-i Dima Hasao o Cachar district tem reprangtsü.

Maneni, Nilima Devi nem Bajali o Udalguri, Pijush Hazarika nem Nagaon, Hojai, Karbi Anglong o West Karbi Anglong, Ranaj Pegu nem Biswanath o Golaghat aser Susanta Borgohain-i Majuli o Dibrugarh nung guardian minister inyaktsü.

Assam nung guardian minister system ya minister tem aser district administration tem tsüngda tesentaktep tajung ayutsü atema lir. Iba inakyim kübok minister temi terenlok mapatongtem ketdangsüa reprangtsü, government schemes inyakba meyipa reprangtsü aser district-level tebilemstütem asoshi inyaktsü.

## Kohima & Jalukie nung Capacity Building sentong ayongzük



**Dimapur, Aami/June 07 (TYO):** APEDA North Eastern Region ajanga District Horticulture Office, Kohima den lungjemer 'Export Promotion of Horticulture Produce: King Chilli, Kiwi, Persimmon and Orange of Nagaland' indang Capacity Building sentong ka June 5, 2026 nü District Horticulture Office, Kohima nung ayongzükua liasü.

Iba sentong nung R. Chumben Patton, Asst. Horticulture Officer (AHO) menden liasü aser sentong tenzükua jembidang, pei aliba tesem nung tanga len yoktettsüsa anguba aonsotsütem tsünütsü aser processing, value addition aser export ajanga pai markets ulushityü ayongzükua liasü.

Iba den shilem agirtem dang export procedures, packaging for exports, export quality produce shimsü aser APEDA indang echeme amala angatetsü ayongzük.

Iba sentong nung Mhasizotuo Yashii, Horticulture Inspector (HI); Neichiinu, Horticulture Extension Asst. (HEA); Medolenuo Dzuvichu, HEA; Kenongozo Zao, HEA; Medoneinu Semou, Field Consultant; Joydev Roy, Business Development Manager (BDM); APEDA NER, exporter M/s. Jingshai Enterprises, Guwahati aser

Western Angami Organic FPC aser Seiyhazou King Chilli Farmers Interest Group (FIG) nungi nisung 91 dena liasü.

APEDA ajanga exports nung shilem agi, a APEDA kübok products, region nung agri, export opportunities, exports atema quality aser packaging standards, export atema documents nungdakba indang awareness agütsütsü nükjidong nung iba sentong ya ayongzükua liasü.

Joydev Roy, BDM, APEDA Regional Office, NER ajanga APEDA inyakyim indang lemsatop aser DGFT parotal ajanga IEC & RCMC registration agiba sayua liasü.

Exporter, Rajeev Medhi, M/s. Jingshai Enterprises, Guwahati ajanga NER nungi export nung ajangshiba indang lemsatop aser tanga leni yoktsü asoshi aonsotsütem anepaluba yimya indang rateta ashi.

Maneni Jalukie Block nunga June 6, 2026 nü APEDA North Eastern Region ajanga Dist. Horticulture Office, Peren den lungjemer 'Export Promotion of Agriculture & Horticulture Produce of Nagaland focused on King Chilli, Ginger and Turmeric' indang Capacity Building Programme ka ayongzükua liasü.

Iba sentong nung Dileu Nsarange, Dist. Horticulture Officer (DHO), Peren menden liasü aser Izaile Kulimbe,

Horticulture Inspector (HI). Dist. Horticulture Officer (DHO) ajanga pela agizükba o jembia liasü.

Export nung APEDA shilem, APEDA kübok products, region nungi agri. export opportunities, export atema quality aser packaging standards, export atema documents nungdakbatem indang awareness stakeholders nem agütsütsü nükjidong nung iba sentong ya ayongzükua liasü.

Iba sentong nung Joydev Roy, Business Development Manager (BDM), APEDA Regional Office, NER ajanga APEDA inyakyim indang rateta ashi aser DGFTA portal amshia IEC & RCMC registration agiba indanga sayua liasü.

Dr. Prashant Kalal, SMS, KVK - Peren ajanga iba sentong nung horticulture products tem anepaluba indang jembia liasü.

Iba sentong nung Dr. Prashant Kalal, SMS, KVK - Peren; Imkongtong Longkumer, SDHO; Ibotui, Asst. Horticulture Officer (AHO); Pezavitso Haralu, Horticulture Extension Asst. (HEA); Benathung Lotha, Dist. Field Consultant (DFC), APEDA NER aser Jalukie FPC, Tening FPO, Peren FPO, Ahthibung FPC aser SHGs nungi dena liasü. Iba sentong nung nisung 84 shilem agia liasü.

## Niuland nung Mini Legal Service Camp ka ayongzük



Neiko Akami, NJS, Member Secretary NSLSA ajanga Niuland nung June 6, 2026 nü Mini Legal Service Camp semzüksü dang tangokba noksa ka yangi angur.

**Dimapur, Aami/June 07 (TYO):** Nagaland State Legal Services Authority (NSLSA) ajanga Dimapur District Legal Services Authority (DDLSA) aser Niuland District Administration den lungjemer June 6, 2026 nü Deputy Commissioner, Niuland indang Conference Hall nung Mini Legal Services ayongzükua liasü.

Deputy Commissioner, Niuland, T. L. Kiusumong Tikhir-i sentong akhumdong ka ama jembidang, züngsemtem pela agizük aser nürtem nem pei temeden angatetdaksütsü, talisa district nung tanur, tetsür, lemtamar, lanur aser labourers nem par temeden

anagatetdaksütsü nükjidong nung iba sentong ya ayongzük ta ashi.

Neiko Akami, NJS, Member Secretary NSLSA ajanga iba sentong nükjidong lemsatop dang, district nung aliba nürtem ajanga nem legal service angati agütsütsü asoshi ayongzük aser nisung shinga ochi obendang monguteti meyutsütsü mesüra district nung amshiba sorkar schemes tem magütsü meyutsütsü, ta ashi.

Neikho-isa state nung National Lok adalat inyakyim lemsatop aser küm shia mangatetep ken o tila tem tajunglen nungi

angatetpedaksür ta ashi.

Iba sentong nung department balala ketdangsür aser staff temi nürtem dang angati legal service agitsü yimya sayu aser district nung sorkar indang projects aser schemes tem indang lemsatopa liasü.

Sentong nung N. Longshithung Ezung, NJS, PDSJ Cum Chairman DDLSA ajanga pela agizükba o jembia aser Atoka Achumi, NSJ, CJM Cum Secretary, DDLSA ajanga melepzüng o jembia liasü.

Iba camp nung Adv. Thuswangwiliu, Panel Lawyer DDLSA menden liasü aser Kivitolu Aye aser medemer temi NSLSA Theme song aten.



OFFICE OF THE  
MOPUNGCHUKET SENSO MUNGDANG

Mopungchuket; Impur: 798615

## TENÜNGSANG AGÜTSÜR

Mopungchuket Senso Mungdang ajanga ozü lenir Wabong Er. R. Lobosang Jamir-i sorkar wadang nung nürtem tenzükua arur, tang pai Nagaland sorkar kübok Nagaland sorkar kübok, Power Department nung Chief Engineer menden tongteta noktaketba atema tenüngsang tulu agüja tushir.

Nai meranga inyakba ajanga süngjang tajung ajangzükta asen yimer ajak ne takok nung pelasemer aser tejaktenteta noktaker.

Asen Sensosanger aser Mungdangi ne mapa aser wadangtem ajak nung tajungtiba agi nürtem tenzükta atema anema aliba aser arishi talang moajang ta asen Teyanglur Tsüngrem dang mepia sarasademtsür.

Sd/-  
Imlitongzuk Jamir,  
President  
Mopungchuket Senso Mungdang.

Sd/-  
Nukshitemjen Lemtur,  
General Secretary,  
Mopungchuket Senso Mungdang.

## Longleng & Wokha DPDB enden ayonger

**Dimapur, Aami/June 07 (TYO):** DPO & Member Secretary, DPDB Longleng, B. Longai Phom ajanga ita shia amenba District Planning & Development Board senden June 2026 atema June 10, 2026 anüngdang 11:00 ako nungi tenzükua amentsü, ta ka nung metetdaksüogö.

Maneni Advisor & Chairman, District Planning & Development Board (DPDB),

Wokha aser Deputy Commissioner, Wokha nati sangdong ka nung June 2026 atema ita shia amenba DPDB senden June 10, 2026 anüngdang 11:00 ako nungi tenzükua Deputy Commissioner, Wokha indang Conference Hall nung amentsü ta metetdaksüogö.

Iba senden nung DPDB züngsem ajak medema adentsü ayongzükogö.

## AI kumdanga amshitsü seminar Lewis Academy nung agütsü



**Dimapur, Aami/June 07 (TYO):** Artificial Intelligence ajanga tanü asü shisaluyim yimya melenshitsuja ajanga Lewis Academy, Dimapur-i instudia den lungjemer AI integration indang seminar ka Honibarnü ayongzükua liasü.

Iba sentong nung kaketshir aser tesayurtemi shilem agia academic tsütsü tajungba akumtsü aser tarutsü nung nungdakba skill development nung technologies amshitsü lenmangtem bushia liasü.

AI tebenja aliba kanga junga lemsaba nung rangloker seminar ya ayongzük, anungji iba sentong nung adener nem iba tashi tait digital hadir kumdanga amshitsü angazükdakja liasü.

Daniel Changkija, Director, instudia ajanga iba sentong nung jembidang region nung technological literacy angatetsü nungdakba indang lemsatop.

Pai ashiba agi, shisatsü angazükba inyakyim nung AI amshitsüba ya 'optional' ka masü saka alima sapang nung tokteptsü atema kaketshir ka renemba nung nungdak kumogö.

Dimapur nung aliba lanurtem nem 'automated' lima ka nung nungdakba skills agütsütsü instudia mangdang lir, ta pai ashi.

Shisalen sayur Vishal Bardewa-i anir technical aser interactive training shilem agidang, temelenshi alitsüsa angazükba nung AI amshitsü indang onük lemsatopa liasü.

Study schedules yangluba, academic subjects tasak temelaba kumdaksüba aser research atema intelligent co-pilot ama AI sapang tem kaketshir temi amshitsüba yimyatem pai sayua liasü.

"AI ya nisung meimchir tekolok shisatsü melentsü atema masü, saka tangatetba tali tajungba kumdaksütsü, mapa tasak temelaba kumdaksütsü aser tajungba nung angatetsü asoshi maongka tasen agütsütsü asoshi lir," ta Bardewa-i ashi.

Iba seminar tembanga sensaksemba mapang agia kaketshir aser tesayurtem AI yimya shidak nung amshitsü, data privacy aser tarutsü nung careers yimya melenshiba indang jembia liasü.

### Minister Pradhan-i menden nungi malu tashi longkak aittsü: CJP



New Delhi, June 07, 2026: Amongnü Cockroach Janta Party (CJP) tentetsang, Abhijeet Dipke par ki tonga aoba mapang tetsüi pa agizükdang tangokba noksa nung angur.

**New Delhi, Aami/June 07 (Agencies):** Amongnü Cockroach Janta Party (CJP) tentetsang, Abhijeet Dipke-i, India nung tongti examinations aser recruitment tests ochimashi dak sendakba nung Union Education Minister, Dharmendra Pradhan-i menden nungi malu tashi longkak aittsü, ta metetdaksü.

Dipke-i, New Delhi nung aliba Jantar Mantar nung longkak aitba sentong takok ngua agiogo aser iba sentong nung nisung 7,000-i shilem agia liasü, ta metetdaksü.

Amongnü anepdang pa Maharashtra kübok Chhatrapati Sambhajnagar district-i oa par ki tonga aoba mapang nung par kibong züngsemtemi pa pela agizük.

Tesülen osangbenertem den jembidang Abhijeet Dipke-i, "Onoki longkak aitba (Jantar Mantar nung) sentong takok

ngua agiogo, kechiyong nisung 6,000 nungi 7,000 shi aden. Onoki linük tesem ajaklen longkak aittsü. Dharmendra Pradhan-i menden nungi manen tashi onoki longkak aittsü," ta metetdaksü.

MIDC Waluj police station nung police officer kati, "Tanü nungi onoki par kidang security akangshio. Tamalen sepai 11 dang lemzükjia liasü saka tangbo sepai 15 lemzüksüo. Sepaitemji local police station aser city police headquarters nungi lir," ta metetdaksü.

Honibarnü Jantar Mantar nung nisung aika adenshia Minister Pradhan-i menden nungi anentsüla, ta takhangba agüja longkak aita liasü.

CJP otongdartemi, Centre sorkari hopta ka tsüingda Pradhan anentsütsüla mesüra pai pasasa anentsüla, yamaji mesüra onoki linük tesem ajaklen longkak aittsü, ta

metetdaksü. Dipke Honibarnep United States nungi Delhi tonga arua liasü. Pa airport atongba mapang nung pa ket nung B R Ambedkar indang taküm otsü kaket ka amer liasü. Delhi Police dang nungi temelaba meshiba sülen pa Jantar Mantar tonga ao.

Activist Sonam Wangchukia longkak aitba pusemogo, iba denji külemi police-i Dipke puadokra pai hopta trok lumia longkak aittsü, ta metetdakja liasü.

Longkak aitertemi education minister menden nungi anentsü atema akhangba den külemi BJP sorkar dang "Hindu-Muslim" politics anentsüla ta takhangba agüja yimyim ayim.

Chief Justice of India-i leplo (cockroach) aser mapa manguba lanurtem indang jembiba sülen May 16 nü Dipke-i CJP ya tenteta liasü.

### Cylinder shia sen 29 atu; cylinder ka nung sen 942 kümogo

**New Delhi, Aami/June 07 (Agencies):** June 7 anogo nungi domestic cooking gas seret 14.2 cylinder nung sen 29 tali tuogo, aser ibaji ajanga Delhi nung cylinder ka nung sen 913 aliba nungi tangbo sen 942 kümogo.

Tesüiba ita asem tsüingda tang agi tanabenbuba domestic gas cylinder jenjang atur.

Jenjang atuba sülen tang Mumbai nung cylinder ka nung

sen 941.50, Kolkata nung sen 968 aser Chennai nung sen 957.50 kümogo.

Taküm March 7 nüa domestic gas cylinder shia sen 60 tua liasü. Tang West Asia nung rara ajanga energy supplies mejungi kongshiba ajanga jenjang atur.

Taküm cylinder jenjang anaben atuba sülen tang Delhi nung cylinder ka jenjangji sen 942 lir, ajisüaka tesüiba mapang

den medemdangra jenjangji ishika dang lir, kechiyong 2022 küm July ita nungbo cylinder ka jenjang sen 1,053 tashi tua liasü.

LPG dang masü saka linük nung petrol aser diesel jenjang-a kanga tuogo. Taküm May ita tomlen nungi tenzüka petrol aser diesel litre shia sen 7.50 shi tuogo aser natural gas-a seret shia sen 6 shi tuogo, ta osang ka ajanga metetdaksü.



June 07, 2026 nü Bolivarian Republic of Venezuela Tir, Delcy Eloina Rodríguez Gomez (ajichilen nungi tanabuba)-i Andhra Pradesh kübok Sri Sathya Sa district nung Prasanthi Nilayam semdangba mapang tangokba noksa nung angur.

### INDIA teloktep senden nung party 23 adentsü: Congress

**New Delhi, June 07 (Agencies):** Hombarnü New Delhi nung opposition INDIA teloktep nung aliba lenirtem senden ka amentsü, aser ibaji tawa state pongu nung assembly election agia osang sangdongba sülenbo mezüingbuba senden asütsü. Amongnü Congress general secretary, Jairam Ramesh-i, Delhi nung aliba Constitution Club nung ayongzükba INDIA teloktep senden nung party 23 adentsü jangjaogo, ta metetdaksü.

"Yimtenren party 23-i June 8 anüingdang 12:00 ako nung Constitution Club, New Delhi nung ayongzükba INDIA janbandhan senden nung adentsü ta shiogo," ta Jairam Ramesh-i Amongnü X ajanga metetdaksü.

"India ama INDIA janbandhan maneni longjemer nokdaker," ta pai metetdaksü.

Iba senden nung adentsü atema All India Trinamool Congress tongti, Mamata Banerjee-a Amongnü Delhi tonga ogo.

TMC nungi Rajya Sabha MP, Derek O'Brien-i, "Külem nükjidong ka atema senden amentsü. INDIA longjema lir.

Iba senden nung adentsü atema party aikati yongyar," ta metetdaksü.

Iba senden nung adentsüpur tongti lenirtem rongnung TMC tongti Mamata Banerjee, party national general secretary Abhishek Banerjee, Shiv Sena (UT) lenir Uddhav Thackeray, SP lenir Akhilesh Yadav, Congress lenir Rahul Gandhi aser Congress National Tir, Mallikarjun Kharge nunger densema lir.

Ramesh-i, iba senden nung opposition party karbo medentetsü, ajisüaka parnokia maneni BJP-i aniba sorkar anema nokdaker, ta metetdaksü.

Ramesh-i, Centre sorkari India nunger million aika indang vote agütsüba temeden rakzüker aser anogo shia linük temzüng anema inyaker, ta aitsü.

Paisa, Centre sorkari investigative agencies amshia opposition lenirtem anema inyaker, jenjang maneni atur aser foreign policy ajanga linük jenjang raksatsür, ta aitsü.

INDIA teloktep senden nung Dravida Munnetra Kazhagam aser Aam Aadmi Party nato medentetsüa akok.

### Rajasthan nung mesen mozü amshiba ajanga aluyimer 535 asü

**Jaipur, June 07 (Agencies):** Rajasthan nung tesüiba küm ana tsüingda alu nung mesen mozü amshiba ajanga aluyimer 535 süogo, ta Rajasthan state assembly nung metetdaksü.

2024 küm January ita nungi 2026 küm January ita tashi nung alu nung mesen asütsü mozü amshiba ajanga aluyimer 535 asü, ta agriculture department-i metetdaksü.

Aluyimer teimba asüba district ji Bikaner (57) liasü, iba sülen Churu (56), Hanumangarh (42), Jhalawar (42), Jodhpur (38), Sriganganagar (31) aser Beawar (31) lir.

Küm ana tsüingda state sorkari takoksa angur kibongtem nem senotsü teyari sen crore 5.1 agütsüo, ta ketdangsertemi metetdaksü.

Bikaner nung takoksa angur aluyimer kibongtem nem ajak senteper sen lakh 92 agütsü, Churu nung takoksa angurtem nem sen lakh 72, Jodhpur nung lakh 58, Hanumangarh nung lakh 48 aser Sriganganagar nung takoksa angurtem nem lakh 18 agütsü.

Jhalawar nung aluyimer 42 asü, ajisüaka takoksa angurtem nem sen lakh 18 dang agütsü aser Deeg nunga aluyimer 8 asü saka senotsü teyari kecha

magütsü. Kishanpole MLA, Amin Kagzi-i, "Aluyimba mapa inyakdang aluyimer noklang aika süadokra sorkari senotsü teyari agütsüba kija ajanga teka metsükdoktsü makok. Mesen asütsü mozü amshiba tsütsü inyakyim aser telatetba tesashi alitsüla, aser state tesem ajaklen aluyimertem atema 'comprehensive safety programme' ka alitsüla," ta metetdaksü.

Iba dak alia alu nung mesen asütsü atema amshiba mozü sample 189 bo 'quality' tamajung liasü, ta assembly nung metetdaksü.

Rajasthan nung mesen asüba mozü sample 5,570 bendenba nungi 5,521 tendanga liasü; ajioda sample 5,332 temsüa liasü saka sample 189 bo tamajung liasü.

Rajasthan agriculture minister Kirori Lal Meena-i, sorkari mozü mamshii alu ayimtsü atema ajungshir iba denji külemi mesen asüba mozü kanga kümdanga amshitsü ajungshir; tarutsü nungbo aluyimertem asüba nokdangtsü atema telemtetba kar agia inyaktsü, ta ashi.

Minister-isa aluyimertem dang aluyimba ali shilem 25 bo mozü mamshii aonsotsü tsünütsüla, ta ajungshi.



# TIR YIMYIM

## YIMOBILEM (EDITRIAL)

DIMAPUR MONDAY, JUNE (AAMI) 08, 2026

### Mulungzürepa alirtem

Tanü putu nung tanur tain aser takar sensaker mebendangi timtem aser takoksa ajuruba tashidak kaji mulungzürep tia ajuruba ya lir. Iba mulungzürep yabo aseni meimba ka alima nungi pilaa orr jashia mulungzürepba ya masü saka taküm nung teimla samar temulung zürepba indang lemsatepner. Aji oda, tanü asüng kaketshirtem aikati medical aser engineering züngner saka makoker. Ano, kaketshir karibo medical aser engineering ji mezüngner saka tsüraburtemi kangshia züngdaksütsü meranger. Iba ama mapang nung tanurtemji jashir aser temulung züreper. Iba ama mulungzürepa jashiba mapang ajurudang, nisung karbo alima nunga melinüi akümer. Atangji, alima nung alir asünungji nisung shia taküm nung mulungzürep tia ajurutsüsa tejashi mapanga ajurutsü, ajisüaka iba jagi asen taküm nung teimla mesamai tashi itshitsüsa asenok dak tangatetba alitsüla. Aji oda, mulungzürep tia akoktsüba mozüji tepela lir aser tepelaji teimla nungi angutsü. Ibaji meteta asenok kibongtem nunga apuani tsüngda aser tsüraburo o tanurtem na tsüngda kati ka aitsütepba masü saka kati ka ajungshitepa pelaa alitsübaji kanga tongtibang lir. Aiben asenok kibong nung apuani tsüngda kinungtsüi kinungbui bener aruba rongsen dak tenük masüng jembidang kinungbo mulungzürepdaksür, anungji kinungboji temang aser tokolok nung shisabolu mesamai mangmanga laor aser taküm piyong temang marakzükteti timtema alitsüsa akümer. Kasaji, kibong aika nung kinungboi kinungtsü mapa agi tenük masüng merenshir aser maksütsür, iba jagi kinungtsü mulung züreper aser tokolok meshitaki kuma yiar akümba otsüa lir. Ano, iba dang nungi tali mulungzürep tia ajurubaji lanurtem rongnung kanga bolua ataloker, itemji teimba tsüraburtemi parnok dak aketba sempet aser panok tejangraba mereprangtet aser mangatetba agi ataloker. Aji oda, tsüraburtem aikati pei chirnurtemji pei chirnurtem ama masü saka tangar chirnurtem ama kumdaksüner, saka parnok asoshi aji tamakoktsü, anungji parnoki mejangraba ka inyakdaksütsü kangshi dang, tanurtem aika mulungzürep tia iadoker. Ibaji dang masü saka tanü asüng tanurtem aika pei takdang nungi mayazüki amang sangwa piyong mobile phone amshia kazür aser mobile ajanga anguba aser metettepbatemjiang parnok asoshi asangsang lima amai kumadoker, idangji parnok temulung aser tokolok balaka kuma oa raksar aser mulungzürep tia aier. Item tensa tia ajakji meteta, kibong nung tsüraburtemi, kaktereju nung tesayurtemi, lokti aser arogo nung lenirtemi mulungzürep tia nung alirtemji reprangteta parnok nem teimla agütsütsü nüngdaker aser tanüngba tsürabur aser tanurtema mulungzürep tia maitsüsa tangatetba agüja anepalutsüla. Atangji, nisung ka mulungzürep tia aibaji pei taküm dak temulung masüba agi aser pei akaba dak tenüng masüngba agi aier. Aji oda, kodang nisung ka peisasa pei dak jashia mulungzürep tia idir, pai mesüra lai tangar tsüngdang, kecha tai mali ser nung nümamedangteti akümer, kechiyong pai pasasa mesüra lai lasasa kanga ilaa aser akseta bilemer. Ano, nisung karbo nisung aser Tsüngrem tsüngdang tai menar, aji menangzüktetba ajanga mulungzürep tia aiba alitsüa akok. Item asoshi maongka aser taochi angudak tesem ka nüngdaker. Item amaji asenoki süoki ia mebilemdanger dang ashi, asenok meketa asen kiyonger, asen yimer aser asen nisung aika pei taküm, mapa aser kibong agi peisasa pei nümamedangtet mulungzürep tia nung lir, anungji item nemji teimla agütsürtemji asenok asütsüla. Parnokji menüja masü saka meima tonga oa aneplutsübaji kanga nüngdaker. Ashiko, item mulungzürepa alirtem rongnung karbo takar aser nüngtugu nisunga asütsüa akok, saka ano karbo sentsütsür, karbo yijemer aser mozü mora achir, karbo pei mang ayoker aser karbo peisasa pei mazüoktet alirtem asütsüa akok, item ajakji tashi aser tasü tait senso tajung kaka kumdaksütsübaji senso tajung shia khuret lir.

# OLEMSABANG

## NI TULUR KÜMERBO

- Thriocy Stm, Mokokchung

Ni ya tulur ka kümerbo  
Ni asoshibo bodyguard-a menüngdaksü,  
Driver ka lira aji teperi.  
Ni aolen ajak nung Sepay aika  
anidaktsü menüngdaker,  
Ochiba nung jajara tetsübo mali.

Ni tulur ka kümerbo  
Sorkar wadang nung inyakertem  
Ochi mashiba tera danga putetra  
taochi mesayutsü, bang bang ta mapa  
nungi sodi agütsütsü, nia ochi nung dang alitsü,  
Nüburtema ochi nung dang anitettsü.

Election agidanga nibo rongsen lalushibong masütsü,  
Shirnoki mulungsoa yariner yariang,  
Rongsen laluba den rongrong adoka  
lenir shimteta alima anira nübur madak  
temoatsü malitsü, aser Tsüngrem mepelatsü,  
aji nüburtem dang angateta ashitsü.

Asen Naga lima telongtet nung dang  
Lenmangji kanga tulujia menüngdaker,  
Tilaka dang süaka tesem ajaklen Jungjunga  
yanglutsütsü aser lenmang merüka ayutsü asoshi  
Teinyaker taa talang agüja ayutsü.  
Ni tulur ka kümerbo.

Temaba menden nungi maka maiter  
sensaker asoshi kechisa teyari  
lemzüksür, item ajakji len tom nung  
mesamadaksüi tsüngtong bener oa agütsütsü.  
Ni tulur ka kümerbo.

Yi yoka kibong mesürtem asoshi  
par kibong yari mapa agütsütsü,  
Sepaytem shirnok duty nung lia yi abenertem  
gate adendaksüdir  
Dutypurji jaa mapa nungi anendaksütsü.  
Nibo taochi mesayutsü asen lima ajungtsüba dangji.

Mozü kidang Doctor aser nurse tem  
Mapang shitak mamshitra parnok jar merenshitsü,  
Emergency doctor ka mozü kidang masü  
Saka pei kidang kazüa lira temerenshi angutsü.  
Mozü kidang koba machine sa nüngdaker  
Ajia bener aruagi amenoka yutsütsü,  
Shirangertem bendanglen timtema mesenzüdaksütsü.

Tanü reprangdangra asen Naga lanurtem  
Kaket shisatsü nung dang masü,  
saka saisabong nunga tajungba kuma oaba angur,  
anungji parnok asayadak jia jungjunga yanglutsütsü.  
Stone dust masü saka sü tajung lema yutsütsü.  
Ni tulur ka kümerbo.

Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir

# Jordan nung tang mezüng Khristan University ka semzükogo



Jordan King Abdullah II-i UNESCO World Heritage Baptism Site nung mezüngbuba Khristan University semzüktsüba sülen tangokba noksa nung angur.

**June 07, 2026:** Khristan shisaliok ajungkettsütsü atema Jordan King Abdullah II aser Jerusalem nung Patriarch Theophilos III nati Baptism Site nung tang mezüng Khristan University, International Orthodox University semzüktsüogogo.

University tasenba ya Yohan baptibai Yisu Khrista baptitsüba tesem Al-Maghtas nung lir, aser iba university ya Jordan nungbo mezüngbuba Khristan university asütsü.

2015 küm Baptism Site ya UNESCO World Heritage Site ka sangdonga liasü. Alima tesem balala nungi temeshi ainlen jajar Khristantemi iba tesem kanga semdangar.

Iba university semzükba

sentong nung Jordan nung tamarener kibong züngsemtem, Jerusalem nung aliba Arogo nung tekolakpurtem, sorkar ketdangsertem aser shisashirtem aika aden.

Arogo nung lenirtemi, iba University amenokba ajanga tarutsü nung Khristantem züintsü, Khristan shisaliok ajungkettsütsü aser yimsü balala amangertem tsüngda amalitep jenjang ajungkettsütsü, ta metetdaksü.

University semzükba sentong nung jembidang Patriarch Theophilos III-i, iba ya tamang aser tenzükba tsütsü mangdang ka lir; iba university ajanga theology aser science, tamang aser shisadangba, sobaliba aser tanü putu sobaliba

sendakteptsütsü, ta ashi. International Orthodox University ya ajanga theological shisaliok dang masü saka putiotsü, lenisüba aser sobaliba shisaliok ajungkettsüba den külemi yimsü balala amangertem tsüngda tangatetep ajungkettsütsü.

Patriarch Theophilos-isa King Abdullah II-i Khristan aser Muslim nungger temeshi tesemtem wazüka ayutsü atema inyakba atema pa nem tenüngsang agütsü.

Iba university ya Yisu baptiba tesem nung amenokogo. Osangtajung kaket Luke nung shia aliba agi Yisu baptiba mapang "temang nung posü ama Tanela Temeshi alua Pa dak atem."

# Ukraine-i WCC dang Russian Orthodox Church agientsü akhanger

**June 07, 2026:** Ukraine-i Russian Orthodox Church maneni aija World Council of Churches (WCC) dang Russian Orthodox Arogo züngsem agientsüla, ta takhangba agütsü.

France nung Collège des Bernardins research centre-i ayongzükba seminar ka nung jembidang Ukraine State Service for Freedom of Conscience tongti, Viktor Yelensky-i, "WCC-i Russian Church ya züngsem nungi agientsüla, kechiyong parnoki Khristan tesayubatem den meputep inyaker," ta metetdaksü.

Yelensky-isa, "Moscow Patriarchate ya yimsü temeden aser Ukraine naprongla atema tsükchir. Parnoki yimsü temeden anema inyaker aser Ukraine nungger nüchiso, sobaliba aser maitsü samatsütsü nukjidong nung inyaker," ta metetdaksü.

Russian Arogo nung tongti Patriarch Kirill den külemi rara pusemer Arogo lenirtem anema inyaksüla, ta paisa metetdaksü.

Tang tesüsa Russia-i amakdang nisung 22 tepsetogo aser Ukraine nung yimsü lenirtemi ashiba agi, Russia-i amakbaji Arogo nung lenirtemia pusemer.

Ukraine Council of Churches & Religious Organisations-ia Russia-i amakba aija, "Azü tokshiba mapa ya Ukraine nungger li amaker Russia nungertemi lir, aser ibaji Moscow Patriarchate (Arogoi) pusemer. Russia-i ozüng alema inyakba nung Russian Arogoia tongti shilem ka agir," ta metetdaksü.

Ukraine Council of Churches & Religious Organisations-isa, "Sorkartem, Arogotem, melungtet teloktem, shisashirtem aser nüburtemi Ukraine pusema ola adoktsü aser temenen mapatem anema ola adoktsüji kanga tongtibang kümogo," ta metetdaksü.

Tang World Council of Churches (WCC) nung denomination züngsem 356 lir aser Khristan nütsüng million 580 lir.

2022 küm February ita nungi Russia-i Ukraine amakba

mapang nungi tenzükba WCC dang Russian Arogo ya council nungi agientsüla, ta takhangba agütsü.

Linük 15 nungi Anglican, Orthodox, Roman Catholic aser Protestant lenirtemia shidi ka nung sign süa WCC dang council nungi Russian Arogo agientsü akhanger. Iba temepishiba shidi nung sign süa alirtem rongnung taoba mapang Archbishop of Canterbury, Lord Williams densema lir.

Ajisüaka 2022 küm June ita nung World Council of Churches-i iba temepishibaji magizük.

2024 küm April ita nung WCC general secretary, Rev Professor Jerry Pillay-i, Russian Arogo nung tongti, Patriarch Kirill-i sangdong ka ajanga iba rara ya anüolen linüktem anema temeshi rara ka lir, ta jembiba oji council-i shisadangdar, ta metetdakja liasü.

Tan hopta Professor Pillay-i, Russia-i maneni amakba aitsüba den külemi International ozüng akhümtsüba rara anentsü atema tayongzükba agüja liasü.

# ANOGO ABEN TSÜNGREM DEN

## Kar Mebilemtetter

Asenoki maneni sensaker bilemtettsüla. Galatia 2: 10.


Tsüngrem mamanger kati tanur ka süoshi teraksa sobur tenla kidang nungi aruya alidang pai iba anepdang kechi angazük ? ta asüngdang. Tanur jagi langzü - "Tsüngrem-ji temeim lir". Pai asüngdang: "Tsüngrem temeim süra, kechiba ne nem tola aser tsüngsem tasen agütsütsü pai kar dang majungshir ?"

Mapang tatsüka tanur jagi ola madoki lir jashia langzü. "Tsüngremi kar dang shir alitsü saka amadoker alitsüa akok".

Mapang ajak nung Kibubai Pa o nung Khristantem shirnok teyari nüngdaka lir parnok yaritsü aser iba mapang tajung bushitsü aser Pa tenüng nung Pai asenok yariteptsü bilemtetdaksür. Shibaisa Tsüngrem meimer pai pei adianu meimer ta Pai bilemtetdaksür. Tzü zü marok ka danga Pa tenüng nung agütsübaji Pa dang inyakba ta Pai bilemtetdaksür. Nüngdakba pur meyarira asenok dak Tsüngrem temeim mali ta bilemtetdaksür. Asen Kibubai asenok dang Samaria nungbai tajung inyakba ashir, saka asenoki tilaka dang angazüker.

"Kari amadok" ta tanur jagi ashi. Asenoki teti bilemtetdar ma? Bilemtettsü asoshi kechi mapa agi asenok atar? Asenoki tangar dang tali meimra asenoki tali bilemtettsü. Tajung inyaksü bilemtetbaji temeim yimya lir.

# Pastor Yuri Sipko ya 'kiralongrar ka' ta sangdong



Pastor Yuri Sipko

**June 07, 2026:** May 28, 2026 nü Russia nungger Federal Financial Monitoring Service-i arrshi küm 74 Baptist pastor, Yuri Sipko ya kiralongrar ka, ta sangdongogo.

Federal Financial Monitoring Service indang website nung yamai zülua lir, "SIPKO, Yury Kirillovich, 1952 küm February 28 nü Tara, Omsk Oblast, Russia nung aso."

Pastor Sipko ya taoba mapang Russia nung Union of Evangelical Baptist Christians tongti liasü aser pai mapang shia social media ajanga Russia-i Ukraine amakba aitsür.

2023 küm August ita nung Russian Federation indang Investigative Committee-i pa anema bushisüngdang tenzük. Bushisüngdangba mapang nung par ki mita ao saka pabo jena oteta liasü.

Iba mapang nungji Sipko-i, "Ni jail nung puoktsü atema parnoki ni bushir, kechiyong ni Russia-i Ukraine anema raraba dak sendakba nung ochi jembir. Nisung jenti asür aser ajak samatsür. Iba ya ozüng alema lir; parnoki yamai meinyaksüla," ta metetdakja liasü.

2023 küm World Watch Research nungi Rolf Zeeger-i, "Osang tejangjabo mangu, ajisüaka Sipko-i Russia toktsür jenogo. Pa dak atalokba ya Russia nung aliba Khristantem atema tansütsü ka lir, anungji Khristantemi kanga kümdanga jembishinüa inyaksüla," ta metetdakja liasü.

Interview ka nung jembidang Sipko-i, "Ni anema tai tongloktsüba ya yimtenren tsütsülen nung lir. Ochi atema nokdakba nung ni pusemer ajak dang ni pelar," ta metetdakja liasü.

Pa pusemer kati Facebook ajanga, "Yuri Kirillovich, na ajanga onok nüma atanger. Tsüngremi na moajang! Mathi 5:10-12: 'Temeshiba atema shir reshikangshiogo parnok temoatsüba, kechiaser kotak yimli parnok meyong. Kodang nisungi ni asoshi nenok atalaa arütsüdir, aser nenok reshikangshidir, aser nenok anema tiyazü agi tamajung ajak jembidir, idangji nenok temoatsüba. Temelung chiang, aser pelaang, kechiaser kotak nung nenok tajangzük tulu lir,'" ta lemsatep.

**AO OSHI ANGAZÜKDAK:**

**TANÜ ANGAZÜKTSÜBA OJANG**



**Yimlibilem**

(n) aria aser aochia bilemba (grace, please)

\* Yimlibilem taochi agi Yisui asenok kümzük.

**Yimlisütep**

(v) tangatettep, agizüktepba (reconcile, compromise)

\* Alima nung nisungtem rongnung yimlisütep alitsüla.

**OLONG PAITEP # 7528**

	1	2		3	4	5
6					7	
			8	9		
		10				
11						
			12			
13	14	15				16
17					18	

**TIPIEN**

- 1. Inyaker ajangtetba
- 3. Bangsemo adokdak
- 6. Shitak mesüi inyak
- 7. Ya mimong nung angur
- 9. Reprangzük
- 10. Tasola
- 11. S \_\_\_\_\_
- 13. Yagi ajak ashioktsür
- 15. Ki aokba oset
- 17. Ak shi nung inokba tasen
- 18. Ishika

**LANGTSÜNGLEN**

- 1. Meshidak
- 2. Tanaben soshir
- 3. Iba anogo
- 4. Meshi
- 5. Yagi mi tsükloker
- 6. Shi tapu ka
- 8. Yagi ayimer saka ozü masü
- 9. Ajokba shiruru ka
- 12. Inyaktet
- 14. \_\_\_ hi
- 16. Akümüli nungi pilar

**OLONG PAITEP # 7527 TELANGZÜBA**

**TIPIEN :**

- 1. Telok, 4. Aluru, 6. Ozüing, 8. Emk,
- 9. Kin, 10. Teti, 12. Süir, 13. Jen,
- 14. Ola, 16. Talak, 17. Mazük.

**LANGTSÜNGLEN :**

- 1. Tenükjang, 2. Luden, 3. Kiooktsü,
- 5. Lenti, 7. Tajangzük,
- 11. Teronem, 12. Sempa,
- 13. Jahaz.

**NAI-A YA METETTER**



Titan-i "deepest underwater product photoshoot" atema Guinness World Record ka yangluogo.

Titan company-i Indian Ocean nung 52.1 metres telungi Zero Hour Professional Diver's Automatic 500M watch bener ai aser photoshoot agitetba ajanga iba otsü tasen yangluogo.

**Assam sorkari state award anguba tesayur ka shimshir**

Guwahati, June 7, 2026 (Agencies): Assam sorkari retired state award-winning teacher ka ano küm ka mapa inyadkatsüsü shimogo.

Dhubri district nung aliba Kaldoba High School nung taoba headmaster Dr. Mizanur Rahman April 30, 2026 nü mapa nungi anistingzüka liasü saka pa tanaben ano küm ka atema shimokogo.

Shisaliok nung state award angurtem mapa nungi sodi

anguba sülen mapang tatakzük ka atema inyadkatsüsü policy kübok pa shim ta ketdangsürtemi ashi.

Dr. Rahman-i Dhubri district telongtet nung pai mulungba school ka nung inyaksü akok ta ketdangsürtemi ashi.

Assam sorkari 2017 nung Dr. Rahman nem excellence in teaching aser institutional leadership atema state award agüja liasü.

Kasa küm Dr. Rahman-i school tem nung transparency & accountability ajungketba ajiteta national award agütsü.

"Sayuba ya ka taküm piyong atema asütsü ta ni tenangzükba agia liasü aser maneni classroom-i aotsü yongyar" ta Dr. Rahman-i ashi.

Iba tesem nung alirtem aser school management committee züngsemtemi sorkar lemtet pelashishia agizükogo.

**Dubai aser Singapore-i Tezpur Litchi bener yoker**

Guwahati, June 7, 2026 (Agencies): June 6 nungi Tezpur Litchi Festival 2026 tenzüka amunger aser iba benjung nung GI-tagged litchi ajungketer.

Tezpur Litchi Festival 2026 ajanga farmers, exporters, scientists, entrepreneurs aser policymakers külemi ajurutepdaksür aser parnoki süngjang atema maongka tasenten bushiteper.

"Tezpur litchi tonne ka tashi Dubai-i yoktsüba lir aser

Singapore-ia seret 500 yoktsü" ta Anand Kumar Das-i metetdaksü.

Maneni, premium Tezpur litchis indang specially packaged boxes 100 tashi Prime Minister's Office-i yoktsü ta paisa ashi.

Iba benjung ya District Library Auditorium, library campus aser Anand Chandra Agarwala Park nung ayonga amunger.

Sentong nung Assamese litterateur Padmanath Gohain

Barua nem tetushi agüja tenzük. Pai Tezpur nung litchi cultivation nung mezüingpur ka ama tongti shilem agia liasü.

Maneni, Tezpur litchi indang putiotsü aser tarutsü indang commemorative publication documenting ka saya aser India Post-i special postal cover ka sayaa liasü.

Iba benjung nungsa exhibitions, documentary screenings, product displays aser sales counters lapoka liasü.

**Mizoram health minister-i neurosurgery services renloktsü nenshi**



Aizawl, June 7, 2026 (Agencies): Mizoram Health Minister Lalrinpuii-i state nung neurosurgery services renloktsü nüngdakba shiogo.

Indian Oil Corporation Limited (IOCL)-i parnok Corporate Social Responsibility (CSR) initiative kübok Zoram Medical College & Hospital (ZMC&H) nem Rs 62.38 lakh alang critical care equipment aser Advanced Life Support Ambulance ka agütsüba sentong nung Minister Lalrinpuii-i iba osang metetdaksü.

Mizoram nung dedicated neurosurgery unit maliba ajanga shirangertem aser parnok kibongtem asohi khuret tulu agütsür. Nisung aika state adena orr sen aika endoka temang anepalutsüsa akümer ta lai ashi.

neurosurgery unit maliba ajanga shirangertem aser parnok kibongtem asohi khuret tulu agütsür.

Nisung aika state adena orr sen aika endoka temang anepalutsüsa akümer ta lai ashi.

"Mizoram nung dedicated neurosurgery unit amenoktsü atema sentong renemogo aser iba ya mapa küma tenzüktsü asoshi medical equipment aser infrastructure support talila nüngdaker" ta Minister Lalrinpuii-isa shisem.

Laisa IOCL dang state sorkar den specialised healthcare services ulushitsü maparen nung maneni

yariteptsü mepishia metetdaksü.

IOCL-i tang tenla agütsüba ya Mizoram healthcare sector nung teyari tulu lir aser iba ajanga emergency response capabilities akangshiba den surgical care tajungba akümütsü aser nisung takütem kümzüktsü ta Lalrinpuii-isa metetdaksü.

IOCL-i CSR initiative kübok C-Arm machine ka, diathermy machine ka aser Advanced Life Support Ambulance ka agütsü aser item jenjang ya Rs 62.38 lakh tema lir ta ketdangsürtemi ashi.

**GOVERNMENT OF NAGALAND**

**OFFICE OF THE DIRECTOR GENERAL OF POLICE**

**NAGALAND:::KOHIMA**

No. PHQ (B-I)1/recruitment/constable/2023/ 663

Kohima Dated 6th June 2026.

**NOTICE**

All concerned candidates and the general public are hereby informed that the Nagaland Police has uploaded the Marks scoresheet/Test results(District-wise) of candidates in connection with the recently concluded 1176 post of Constable (GD) - 2025 on its official online platforms(<https://police.nagaland.gov.in>) & (<https://nagalandpolice.recruitment.in>).

Sd/-

(VIDELALIE ZASHUMO) IPS

Inspector General of Police (Admn)&

Chairman-Departmental Recruitment Board

Nagaland, Kohima.

# Russia-i Chornobyl anasa nuclear totzürizünga ayudak ka amak

**Kyiv, Aami/June 7 (Agencies):** Russia nunger sepaitemi asa Ukraine kübok Chornobyl power plant anasa nuclear totzürizünga ayuba tesem ka amak, ta Ukraine tir Volodymyr Zelenskiy-i Deobarnü ashi. Paisa iba tesem amakba ya kangadang lendong liasü, saka radiation bo spike mesüdahtsü, ta shisem.

Iba tesem amakba sülen nuclear oset aika rizünga yua aliba tesem nungi meter ishika dang pilar fuel-reception ki ka raksaja liasü, ta International Atomic Energy Agency-i ashiba den Ukraine-i parnok nem iba osang metetdakja liasü, ta shisem.

Kyiv indang state atomic agency Energoatom-i ashiba agi, iba tesem amakba mapang totzürizünga yua maliasü. Ki maka mi adokbabo temsepogo aser lendong nung nisung yiruba osangbo kecha mali, ta ketdangsürtemisa metetdaksü.

Iba tesem amakba indang Russia-i osang agütsüba mapang tashi nung yimjak nung sangdonga mali, koba Chornobyl plant nungi km 15 shi pilar lir, kong alima nung nuclear lendong tulutiba ataloka liasü.

"Kanga dang lendong aketba infrastructure facility ka makogo, koba kanga majung," ta Zelenskiy-i X nung zülüsüba den Russia-i iba tesem amaksü atema Shahed attack drone ka amshia liasü, ta shisem.

"Tang tashi nungbo normal background radiation level dang nungi tali akümba osangbo kecha mali. Ajisüaka Russia-i inyakyimbo tamajungba kümogo," ta paisa shisem.

IAEA-i sangdong ka ajanga ashiba agi, team kati iba tesem yakta semdanga tensa asadangtsü.

2025 küm February ita Russia indang Shahed drone kati Chornobyl reactor indang containment arch ka raksatsü,

koba 1986 küm April ita apokba aser yimsa aoba ajanga raksar liasü.


Russia-i Ukraine nung yimti aser infrastructure tem drone aser missile tem amshia makar arudar saka parnok iba tesem amakba ya magizüki liasü.

Maneni southeastern Ukraine nung Russia-i atsünger aliba tesem nung Zaporizhzhia Nuclear Power Plant amakba atema Kyiv aser Moscow na kati ka aitsütepa arudar. Iba plant ya Europe nung Nuclear Power Plant tulutiba lir.

Russia aser Ukraine na yimjung atema mapang talangka sensaksema arudar, saka tang tashi telemteba ka magiteti aliba mapang linük ana yagi kati ka indang energy infrastructure tem drone aser missile amshia maktepa arudar.

US teyongtsü ia yimjung atema sensaksema arudar, saka February ita US-Israel nati Iran amak tenzükba sülen iba sensaksem ya bangdaka lir.

## Molungnen O



TASOBA: 7/4/1937

TASÜBA: 2/6/2026

*Ni rara tajungji raraogo, ni alizüng tonga asemogo, ni tamangji yuogo. 2 Timothy 4:7*

Ozü tsürapur asür Imnukshiba (Changtongya) shirangba anogo nungi tenzükba asüko tashi kinunger, medemer, arogo, yimden, lokti tentet balala aser kija kibong kwikati nenok temeim sarasadem, nübu, rongsen agi yaritepogo onoki tsüngdong arua majurutetter asünung iba sangdong ajanga tepelaba lemsateper.

Onok mulungsentsü ajak agi kanga dang pelar aser ya ozü tamang sarasadem. Aser asen kümtekdakba Tsüngremi kija kibong shia temeim taochi agi moajangma.

~ Temeim Kinungtsü, Chirnurtem, Semchirtem & Kinungertem.



### OFFICE OF THE LANGPANGKONG KAKETSHIR MUNGDANG

Langpangkong Students' Conference

H.Q. Chuchuyimlang - 798614. Dist. Mokochung : Nagaland  
Email : Langpangkongkaketshirmungdang@gmail.com

### METETDAKTSÜR

Langpangkong Kaketshir Mungdang (LKM) ajanga 3rd buba SURVIVAL MOKOKCHUNG registration Langpangkong Tzükong nung Yimtsüng aser Jila ajak nungi June 1-6 anogotem nung agiogo. Ano maneni, iba mapang arua registration magitetertem asoshi tatemsa yimli ka sayua June 11th 2026 anogo Tuli, Tzüdikong aser Watyongpang tesemtem nung amentsü osang ajak nem metetdaksür. Anungji, yimtsüng Yimden, Kaketshirtem aser Watsü telen-tem ajaki pei süngkumshi kübok aliba Tzümalongmar (Non Local) ajak aser memetetba nisung kar danga lira aruagi tenüng zülukdaksütsü metetdaksür. Item kuli kaket (Documents) tejangja {Passport ana (2) tasenpur atema} bener Local Guardian-temi anir 10:00 AM nung tsünglanglen agüja aliba tesem bushia yoktsü metetdaksür.

June 11th 2026

- FRMCA Hall Tuli - Tuli Town Area, Kelingmen, Asangma, Merangkong, Kangtsung.
- Menji Ki Tzüdikong - Tzüdikong Town Area, Wameken, Anaki Yimsen, Anaki C, Anaki

• Watyongpang

Sd/-  
TZÜWASANEN  
Tir, LKM

Sd/-  
SENTISENLA  
Metetpela Zülur, LKM

# Pakistan interior minister Mohsin Naqvi-i Tehran semdang



Iranian Foreign Minister Abbas Araghchi aser Pakistani Interior Minister Mohsin Naqvi ajurutebpa mapang.

**Tehran, Aami/June 07 (Agencies):** Iran aser US tsüngta yimjung ken o jembishinü tenzükshidaksütsü mechi Pakistan interior minister-i Deobarnü Tehran semdang, ajisüaka American mitkari Strait of Hormuz nung international maritime traffic asoshi timtem ta bilema ano Iran nunger drones ana khazüka yok.

US ketdangsür temi Middle East nung rara tembangtsü asoshi tezüngzüktep ka yanglutsü Iran nungshiba mapang tang iba ya ataloker, koba ajanga alima nung rongsenketzüng jenjang mejungi kumdaksür linük kar nungbo ayawara tenzüktsüsa tensa nung lir.

Kanga sashia rarababo April 8 nü ceasefire ka ajanga tembangogo, saka iba rara teti asoshi tembangtsü mulungtepa mali.

Kasa mapang Israel aser Lebanon nung Hezbollah telungpur tsüngta raraba manener, koba US tetsüngtai ia ceasefire sangdongba taoba hopta ang atsülanga lir.

Pakistan army tekolakba Field Marshal Asim Munir-i Iranian Supreme Leader Ayatollah Mojtaba Khamenei nem osang ka shiokba ashitsü atema Pakistan Interior Minister Mohsin Naqvi ya Tehran nung lir, ta Iran sorkar meyong IRNA news agency ajanga ashi.

US aser Israel nati February 28 nü Iran dak bomb poklokja amak tenzükba anogo tebu tepseter temelen Islamic Republic lenir inyaksü shiba anogo nungi Khamenei ya yimjak nung mangur.

Naqvi-i Honibarnü menur Iranian Interior Minister Eskandar Momeni ajuru aser Deobarnep Foreign Minister Abbas Araghchi den sensaksem aka ta osang ajanga ashir.

Osang nungya kechi aliar mejangja. Ajisüaka Pakistan ketdangsür temi ashiba agi, Qatar, Turkey aser Egypt densema region nung aliba linüktemi yaria Islamabad-i United States aser Iran tsüngta apu alatsü inyaka arur aser tensa tajungba kumdakja Strait of Hormuz tanaben

lapokdaksütsü asoshi inyaker. Kasa mapang US tetsüngtai ia jembir taoba hopta Washington nung Israel aser Lebanon tsüngta ceasefire tasen ka sangdonga liaka rara ajemba mangur.

US tetsüngtai ia züngzüktepba ya Iran-i yariba Hezbollah-i magizüker aser meyiper Iran-i US den rara tembangtsü jembishinüba nung Lebanon ya shilem ka südaksütsü Iran-i akhangba ang bhukumer.

Hopta tatemlen southern Lebanon nung rocket launchers aser command centers densema Hezbollah military sites 150 dak tema makogo ta Israel-i ashir.

Deobarnü Lebanon nungi northern Israel tsütsüi khaloktsüba 'projectiles' pongu shi Israel-i jangjateta anünglak nung lia raksatsü, mesüra nisung malidak tsük. Hezbollah-i Israel dak projectiles khaloktsüba shia mali. Ajisüaka parnok southern Lebanon nung Israel sepaitem dak makogo ta ashir.

(Maneni tapak 8 nung...)

# Pua bener oa alir nisung 360 Nigeria military-i kümzükogo

**Maiduguri, Aami/June 7 (Agencies):** Nigeria nungi security force temi Borno state nung ozüng alema inyaksangshirtemi pur or aliba nisung 360 kümzükogo, kong tanur aser tetsürtema densema liasü.

Itdangitertem nungi osang tejangja angazükba sülen state kübok tenemlen item teloktem indang tesepe ka nungi pur or alirtem ya kümzükba liasü, ta military-i Deobarnü metetdaksü.

Africa anüolen amenoka aliba linük nung ya sorkari meteptemsü balala azüoktsü mekoki arudar, kong kiset shiruru metsürtem tsüngda mangatettep adok nungi tenzükba nisung pur aoba, Islamist militant tem aser community defence militia yongtsüng nung mangatettep adokba densema lir.

Pur aoertem ya Jama'atu Ahlis Sunna Lidda'awati wal-Jihad (JAS) teloki state south len Mandara tekong nung pur yua liasü, ta military-i sangdong ka

ajanga metetdaksü. JAS ya Arabic tenüng ka lir, koba Boko Haram nungi jakzükba telok tongtiba lir.

Nisungtem ya lokti balala nungi pur aoertem lir, ajisüaka parnok ya koba mapang tsüngda nung pur ao aji mejangja.

Tekümzükba maparen ya joint task force kati ayongzükba agi, kong special force tem densema liasü. Parnoki JAS sepaitem ya iba tesem nungi mintoka liasü, ta military-i ashi.

Kasa mapang nung tanur ana kanga belenba aser parnok pua yua aliba tesem nung tzümopung kanga majungba ajanga süogo, ta military-isa shisem.

Africa nung nütsüng yongsük timtiba aliba linük nung ya ozüng alema inyaksangshirtemi nisungtem pur aoba aser telungpur telok balalai timtem agütsüba ajanga mepetmesü nung lir, aser iba ken o ya January ita election agitsü aliba atema ajak dang tongtibangtiba onük asütsü ta amanger.

### FIFA World Cup atema Iran team nem tetuyuba tesashi agütsü

**Aami/June 7, 2026 (Agencies):** Iran team World Cup atema renemshiba nung ano tetsüdahtsüka adoka, linük squad dang parnok United States-i asaya atema aiba anogosa meyipa aotsü tetuyuba agütsüogo.

Mexico dangi Iran ambassador Abolfazl Pasandideh-i, iba tetuyuba agütsüba ya Honibarnü jangjatsüogo aser team nem senzüsenpong atema tetuyuba tesashi agütsüba metetdaktüsügo.

"Onok anepdang itettsü aser kasa anogo meyipa aotsüla," ta Pasandideh-i osangbenertem dang ashi.

United States, Mexico aser Canada nung asayatsü aliba World Cup nung Iran shilem agitettsü magitettsü mapang talangka mejangjai aruba sülen

tang iba ya atalokogo. Ketdangsürtemi ashiba agi, Iran team nung asayar 26 nem United States-i aitsü atema visa agütsüogo. Ajisüaka visa angutsü atema tetsükdaktsü aika ajangshiogo. Kasa mapang nung team den aotsü aliba support staff aser football federation ketdangsürtem 15 shi nem visa magütsü.

Iran aser United States na tangatetep ka dangi maruteti raatepba aliba tialong nung tang item tenokdangba tema agütsüogo. Iran, US aser Israel nung raratepa aliba ajanga iba asayamung daka kongshiogo.

1930 küm mezüngbuba World Cup asayaba sülen tang mezüngbuba rara nung aliba linük ka asayamung ayongzuka asayaba linük kati host asütsü lir.

Visa dak sendakba nung tetsükdaktsü adokba aser

Tehran nung shisabulu tali akümba sülen Iran-i parnok indang World Cup base camp ya Arizona nungi Tijuana, Mexico-i belener aotsü telemtetba agi.

Iran squad ya Deobarnü Tijuana tonga aotsü aser parnok iba tesem nungi asaya atema United States-i oli aruli asütsü.

Iran Group G nung ata lir aser parnok mezüngbuba asaya New Zealand den Los Angeles nung June 15 nü asayatsü. Iba sülen parnok ano Los Angeles nungsa Belgium den asayatsü aser tatembangbuba asaya Egypt den Seattle nung asayatsü.

Senzüsenpongtsü atema tenokdangba agüjaka Pasandideh-i ashiba agi, US nung ketdangsürtemi formally bo parnoki Iran team America-i marudaktsüner ta bo shia mali.

### Ind vs Afg Test: India-i asaya amokbanger asayadar

**Aami/June 7, 2026 (Agencies):** New Chandigarh nung Afghanistan den tang asaya aliba Test India-i amokbanger asayadar. Asayar 8 out sür run 564 yangluba aliba mapang declare asüba sülen India nung rongnungi debutant left-arm spinner Manav Suthar-i ball kanga junga onogo.

India nung batter temi kanga junga asaya-a run aika yanglua toktsüba ajanga India-i asaya amokbanger asayadar. Tananübuba asaya nung Washington Sundar half-century atongba sülen captain Shubman Gill-i declare süa liasü. Sundar-i out mesüi run 52 yanglu aser Mohammed Siraj-ia ball 12 nung run 22 yanglua liasü.

Mezüngbuba innings nung Gill-i run 126, Rahul-i century aser Sai Sudharsan aser Rishabh Pant nati run tirkaka yangluba sülen India team jenjang kanga junga aküm.

Run arishiba mapang Afghanistan-i asaya junga metenzüktet aser Suthar-i pa asoshi mezüngbuba international Test asaya mezüngbuba over nung Abdul Malik out süja liasü.

Iba sülen Prasidh Krishna-i Sediqullah Atal out sütsü. Fast bowler temi mapang shia wicket agi, saka Suthar-i asaya ya aziüoka asaya liasü. Pai maiden over aika aon aser batter tem ayong ayonga

asayatsü asoshi maongka magütsüba sülen Rahmanullah Gurbaz out süja liasü.

Afghanistan nung asayatem rongnungi Rahmat Shah-i tajungba asayateta anogo tembangba tashi nung pai out mesüi run 43 yanglur liasü. Pa ya Afghanistan nung rongnungi Test asaya nung run 1,000 ajungba mezüngbuba batter kümogo. Pa den skipper Hashmatullah Shahidi-i tera junga asaya-a tenati run 36 yanglua liasü.

Ajisüaka Prasidh-isa Shahidi out sütsü aser Afghanistan pur jenjang tamajungba kümdakja liasü. Deobarnü asaya atemtsü lia Suthar-i pa asoshi wicket tasembuba agi. Pai Afsar Zazai out süja liasü.

Suthar-i over 15.5 nung run 21 agütsür asayar asem out süja liasü. Prasidh-ia run 27 agütsür asayar 2 out sütsü. Washington Sundar aser Kuldeep Yadav natia Afghanistan nung batter tem kanga nongshia asayaogo.

Deobarnü asaya tembangba tashi nung Afghanistan team-i over 39.5 nung asayar 5 out ser run 113 yanglur liasü. Parnok asayar tesadang kabo out süatoker ali nung follow-on achitsü ana nung lir. Kasa mapang nung India-i asaya kanga junga aziüoka lir aser anogo asembuba nung asaya akoktsü merangtsü.

### An Se Young-i Indonesia Open kokogo



koka lir. Iba asayamung akokba ya An atema 38buba BWF World Tour title aser la indang career nung tetsür kija asaya title 50buba akokba liasü. Tanga asayar den medemdangra PV Sindhu-i World Tour titles ti aser Yamaguchi-i 26 koka lir.

An ya arishi küm 24 dang asünung badminton asaya ya jenjang balakati ajungkettsü asoshi ano küm aika anunga lir.

La tatemsa tongtibang asayamung ka nung tamakok angubaji All England Open final nung tamakok aguba ya alitsü. Iba asayamung nung lai Wang Zhi Yi makok. La World Tour nung final 11 nung tamakok ngur lir.

**Aami/June 7, 2026 (Agencies):** Korea tsür World No. 1 badminton asayar An Se Young-i Deobarnü Jakarta nung Indonesia Open Super 1000 title küm anabuba atonga benogo.

Iba asayamung tetsür kija asaya final nung lai Japan tsür reigning world champion Akane Yamaguchi 23-21, 21-12 agi straight games nung koka liasü.

Semifinal asaya nung An-i kanga meranga asayarang taoba mapang Olympic champion Yufei koka liasü. Tena tsingda minute 78 kanga toktepa asayaogo.

Tena tsüngda decider asayaba mapang An ya 7-17 agi tesülen liasü aser lai asaya akoktsü timla kangabo maliasü. Ajisüaka An-i kanga junga asaya taruba point ter atonga akok. Ajisüaka Yufei ket nung ano match points pezü liasü, saka An-i shingai mimlai lia iba asaya ya 23-21 agi koka final tongteta liasü.

Final nung reigning world champion Yamaguchi-i mezüngbuba asaya nungbo la

kanga nongshia asaya liasü. Yamaguchi-i la indang retrieval skill tem aser net nung kanga junga asaya-a An nem timtem agütsü. Asaya nung mezüngbuba An ya 4-7 agi tesülen liasü.

Ajisüaka iba sülen An-i meyiper Yamaguchi dang nungi tajungba asayateta la11-9 agi tejekdang aküm. Asayar ana ya point 20-20 tashi kanga toktepa asaya liasü, ajisüaka asaya nung kanga dang tongtibang mapang An-i la asaya kanga junga aziüokteta asaya 23-21 agi akok.

Tanabuba game nungbo asaya tetenzük nungi An-i asaya amokbanger asaya aser Yamaguchi nem point angutsü atema maongka kangabo magütsü liasü.

Mezüngbuba game bo kanga toktepa asaya saka tanabuba game yabo An-i amokbanger asaya-a lia 21-12 agi asaya ayong ayonga kokatok.

Tena tsüngda tang tashi nung 34 ben asayar lir aser An-i 19 aser Yamaguchi-i asaya 15

### BENDANGLI OSANG :

Tapak 7 nungi...

### Pakistan interior minister Mohsin Naqvi-...

Honibarnü southern Lebanon nung raradang Israel nung sepai ana tepset, ta Israel mitkari ashir.

Lebanon nung Israel sepaitemi south tsütsü alinük tuluka agiogo aser iba rara mechi Iran rara tembangtsü aser Strait of Hormuz tanaben lapoktsü merangba nung tetsükdaktsü agütsür, koba totzü aser gas abenba tzü lenmang tongtipang ka lir. Iba tzü lenmang shibangba ajanga alima rongsenketzung kanga mejungi anakshija lir.

Iran-i rara anenba ya Lebanon nunga alitsüla ta ashir. Israel Ato Kilonser Benjamin Netanyahu, shiba küm tatemlen election ajurutsü lir, pai Hezbollah ya tebilemstü akaba telok ka masü ta makum tashi amakba manenner.

Pakistan army tekolakbai jaokba ama Lebanon army

commander Gen. Rodolphe Haikal Honibarnü Pakistan-ia. Lebanon army-i osang tejangja agüja mali aser ibai Iran aser US tsüngtai Pakistan ia jembishinüba nung sendaka ali asü maliar mashi.

Honibarnü US mitkari Strait of Hormuz aser Gulf Arab nung tembar linük tsütsü Iranian missiles aser drones khaloktsüba khazüka yokogo aser aji telangzüba agüja Islami Republic indang coastal surveillance radar sites kar makogo ta ashi.

"Attack drones ya regional maritime traffic asoshi timtem liasü," ta US Central Command ajanga ashi.

Iran indang Revolutionary

Guard-i Ali Al Salem air base nung makogo ta ashir, kong Kuwait nung US sepaitem aliba tesem ka lir. Parnoki Bahrain nunga US Navy indang 5th Fleet nunga amak, ta IRNA news agency ajanga ashir.

US mitkar temi par sepai timtem ajuruba osang mali ta shiogo.

Ita tetenzüklen Iranian drones ajanga Kuwait indang airport tongtipa indang passenger terminal kanga sashia raksaja nisung ka tepset aser aika yirutsü.

Tehran-i strait soita ayuba nung telangzüba agüja US mitkari Iran nung rongnendak tesemtem maneni shibanga lir.

### BILEMDANGANG

"Nü nübu tangari teti dangbo menüngdaktsü."